

Ass. Ena Gotovuša, MA iur

Praktični zadatak I – 03. 04. 2020.

Državna agencija za istrage i zaštitu zaprimila je putem međunarodne pravne pomoći od strane policije iz R. Njemačke – Frankfurta informaciju da državljani Bosne i Hercegovine zajedno sa drugim za sada NN licima iz R. Njemačke pripadaju grupi za organizovani kriminal koja se bavi različitim i teškim oblicima kriminaliteta i na taj način stiču veliku protuzakonitu imovinsku korist. Tako su na bazi zajedničkog rada istražitelji Državne agencije za istrage i zaštitu od istražitelja Republike Njemačke i to policije iz Frankfurta prikupljene i razmijenjene informacije da su BH državljani Dražen M. i Maja S. u više navrata tokom mjeseca marta 2019. godine putem telefona stupili u kontakt sa više lica na području Republike Njemačke i to sa državljaninom Republike Njemačke Kevinom K, te sa istim dogovorili nabavku i prodaju opojne droge „kokain“ i to na način da bi Kevin K. trebao doći u Bosnu i Hercegovinu kako bi preuzeo 10 (deset) kilograma „kokaina“ i dvije improvizovane eksplozivne naprave. Prilikom razgovora između Dražena M. i Kevina K, a koji razgovor je snimljen od strane policije Njemačke je dogovoreno da Kevin K. krajem 7. mjeseca sa svojim motornim vozilom dođe u Sarajevo i preuzme „robu“ jer je tada najveći broj turista u BiH i granična policija zbog velikog protoka vozila ne vrši detaljan pregled na granici, pa je rizik da budu otkriven minimalan.

Nakon zaprimljenih informacija, Državna agencija za istragu i zaštitu je dana 30.03.2019. godine Tužilaštvu Bosne i Hercegovine dostavila informacije sa prijedlogom daljnjih mjera, da bi dana 08.04.2019. godine Tužilaštvo BiH Sudu Bosne i Hercegovine podnijelo prijedlog za izdavanje naredbe o sprovođenju posebnih istražnih radnji iz člana iz član 116. stav 2. tačke a.) i d) ZKP-a BiH protiv Dražena M, Maje S, i Kevina K. zbog postojanja osnova sumnje da su počinili krivično djelo Organizovani kriminal iz člana 250. KZ-a BiH u vezi sa krivičnim djelom Neovlašteni promet opojnim drogama iz člana 195. KZ BiH, te krivično djelo Neovlašteni promet oružjem i vojnom opremom te proizvodima dvojne upotrebe iz člana 193. KZ BiH.

Sud BiH je dana 09.04.2019. godine u odnosu na osumnjičene Dražena M, Maju S, i Kevina K. izdao Naredbu o sprovođenju posebnih istražnih radnji i to: *Nadzor i tehničko snimanje telekomunikacija* iz člana 116. stav 2. tačka a) Zakona o krivičnom postupku Bosne i Hercegovine (u daljem tekstu: ZKP BiH), prema telefonskim brojevima koje isti koriste, te *Tajno praćenje i tehničko snimanje osoba, transportnih sredstava i predmeta koji stoje u vezi s njima*, iz člana 116. stav 2. tačka d) ZKP BiH prema osumnjičenima Dražen M., Maja S., i Kevin K.

Nakon prvih mjesec dana nije bilo relevantnih razgovora na sistemu za zakonito presretanje telekomunikacija Državne agencije za istrage i zaštitu. Drugim riječima one nisu dale konkretan rezultat za prvi mjesec dana primjene. Sud BiH je na prijedlog Tužilaštva Bosne i Hercegovine zbog prirode krivičnog djela produžio iste naredbe za provođenje posebnih istražnih radnji koje je dana 09.04.2019. godine i odredio. Dana 15.07.2019.godine je zabilježena komunikacija između Maje S. i Kevina K. u kojem Maja S. govori: „*Dođi do hotela „Star“ sa svojim autom, ja i Dražen te čekamo večeras u lobiju tačno u 17:00h pa ćemo otići po one stvari*“. Po zaprimanju ove informacije ovlaštena službena lica su se uputila ispred hotela „Star“. Neposredno nakon toga oko 17:15h iz hotela izlaze Dražen M., Maja S., Kevin K. Te svi zajedno napuštaju hotel „Star“ i to na način da Kevin K. odlazi sa svojim pmv Audi A6, i kreće se iza motornog vozila BMW u kojem se nalaze Dražen M. i Maja S. Dva policijska službenika Državne agencije za istrage i zaštitu sa svojim vozilom kreću za njima i to sve do jednog napuštenog skladišta u krugu stare bolnice, kojom prilikom Dražen M. nosi jednu bijelu vreću u ruci i istu predaje Kevinu K. koji navedenu kesu stavlja u unutrašnjost svog vozila. Nakon 10 minuta zadržavanja svi zajedno sa dva vozila napuštaju mjesto primopredaje i odlaze u pravcu centra grada. Policijski službenici Državne agencije za istrage i zaštitu navedenu primopredaju su lično vidjeli, te sve zabilježili fotografisanjem. Nakon toga policijski službenici Državne agencije za istrage i zaštitu obavještavaju specijalnu jedinicu s ciljem lišenja slobode osumnjičenih.

Kako su policijski službenici posumnjali da postoje osnovi sumnje da je počinjeno krivično djelo Organizovani kriminal iz člana 250. KZ-a BiH u vezi sa krivičnim djelom Neovlašteni promet opojnim drogama iz člana 195. KZ BiH te krivično djelo Neovlašteni promet oružjem i vojnom opremom te proizvodima dvojne upotrebe iz člana 193. KZ BiH, isti su na raskrsnici zaustavili motorno vozilo Audi A6 u kojem se nalazio Kevin K, kao i motorno vozilo marke BMW u kojem su se nalazili Dražen M. i Maja S., te su isti svi na toj lokaciji lišeni slobode zbog postojanja osnova sumnje da su počinili krivično djelo.

Policijski službenici Dino i Robert su odmah kontaktirali dežurnog sudiju Suda BiH s ciljem dobijanja usmene naredbe za pretres navedenog vozila, kao i lica koja se nalaze u istom. Sudija za prethodni postupak Suda BiH je izdao naredbu za pretres motornih vozila kao i pretres osoba, međutim nije sačinio službenu zabilješku o izdatoj naredbi za pretres već je usmeno naložio da se izvrši pretres.

Prilikom pretresa vozila marke AUDI A6 kojim je upravljao Kevin K. policijski službenici su kao svjedoka koristila dva policijska službenika, kojom prilikom su u vozilu pronašli bijelu vreću u kojoj se nalazila materija koja svojim izgledom asocira na opojnu drogu „kokain“. Prilikom pretresa motornog vozila Audi A6 su također i u unutrašnjosti vozila u krovu pronađene dvije improvizovane eksplozivne naprave. Prilikom pretresa vozila BMW nisu pronađeni tragovi koji bi mogli poslužiti kao dokaz u krivičnom postupku.

Policijski službenik Dino je prilikom pretresa Maje S. kod iste u jakni pronašao novčani iznos od 50.000.00 EURA koji novac je prethodno Kevin K. isplatio za preuzetu drogu, koji je privremeno oduzet.

Policijski službenici su po naredbi tužioca tokom vršenja pretresa, a za potrebe preliminarnog vještačenja izuzeli 1gram bijele materije za koju su sumnjali da se radi o „kokainu“, te su isti dan izvršili preliminarno vještačenje i potvrđeno je da se radi o opojnoj drogi „kokain“ vrlo visokog kvaliteta. Policijski službenici Državne agencije za istrage i zaštitu su izdali uredno potvrde o privremenom oduzimanju predmeta i iste uručili osobama od kojih su predmeti oduzeti. DNK analizom je utvrđeno postojanje nespornih tragova na bijeloj vreći u kojoj se nalazi „kokain“ koji potiču od Dražena M., Maje S., i Kevina K.

Dražen M., Maja S i Kevin K. su od strane policijskih službenika SIPA lišeni slobode i privedeni u službene prostorije SIPA-e.